

# Tutu e táxnū San Pablu iña ñá ñuú Filipu

Nuu kutū Pablu da táxnū  
ña tutú sa'a iña ña kuínti'xe  
i, ña ntoo ñuú Filipu

**1** Xu'u é Pablú u ni Timōteú ne,  
ña ntáde tsiñu iña Jesúcrístú  
nti. Ntuví nti táxnū ntí tutú sa'a  
nta'a un ntíí ntíí ña'a, ña é ntúntoo  
nima i, tsí uun tsi ña ni Jesúcrístu  
vé, ðivi ñā é ntoo ñuú Filipu, ni  
tó'o iña xúkun, nī ña ntáxnúti ña  
kuínti'xe i. <sup>2</sup>Xuva ko nī Tó'o ko  
Jesúcrístú ne, na nāxnū viko ña  
nto. Na tā'xi ña é kuntōo vá'a nto.

Kaka'an ntâ'ví Pablu  
iña ña kuínti'xe i

<sup>3</sup>Kanakué'e ú sintiá'vi nta'a  
Xuva ko kuēnta iña nto vata dá  
kanaka'ān kó nto, <sup>4</sup>vata dá kakā'an  
ntâ'ví u. Dōo diní ko, <sup>5</sup>tsí nte da  
kuínti'xe nto un tsi da nté veví  
ne, dadíi tsi kade tsiñu nto nī kó  
kuenta iña tú'ūn va'á san iña Xuva  
ko. <sup>6</sup>Iní u tsi é eni ntu'u Xuva ko  
ūun tsiñu e dóo va'á nima ntó ne,  
ña xtúvī mii ña nto da nté ntūntaa  
nto, un tsi da nté ntūvi é kī'xi xtuku  
Jesucristu. <sup>7</sup>¿Nté kui ña kuan koo  
kadá kuení ko iña nto? Tsi dóo ntio  
kó nto. Dadíi tsi kanaxnuu viko

Xuva ko ko ni nto, kuān té nuu kutū  
ú, kuān té kantada ntaa ú tú'ūn va'á  
san é nuu é ntaā i. <sup>8</sup>Kutuni Xúva kō  
tsi dóo ntio kó nto un ntíí ntíí ntó  
vatā ó ntio Jesucristu nto. <sup>9</sup>Kaka'an  
ntâ'ví u te dā díí díí ka kuinima ntó,  
dā díí díí ka kutuni ntó nēe é vā'á,  
nēe é kīni kaa, <sup>10</sup>vata koo é kūtuni  
ntó nēe é díí ka va'á, vata koo é  
ña víi nto é kīni kaa, vata koo é ña  
tuvi kuétsi ntó dá kī'xi xtuku Jesuu.  
<sup>11</sup>Dá tā'xi Jesucristu é víi ntó nuu i  
e dóo va'á, vata koo é na kūnuu iní  
ña'a Xuva kō, vata koo é na kā'an  
ña tsi dóo va'á ña.

Ntuvi iñá ko ne, kuenta iñá Cristu

<sup>12</sup>Ntio ko é kūtuni ntó, ení ko,  
nee iña é kūvi kó ne, díí ka vā'ā o,  
tsí dukuān ó kae'nu tú'ūn va'á san  
iña Xuva ko. <sup>13</sup>Un ntíí ntíí sntadun,  
ñā ntoo nú ví'i ña tsiñu i, ñá nani  
Cesá san, ni ūn ntíí ntíí ña'a, ña  
ntoo i'a ne, ini ña tsí nuu kutū u tsi  
kuínti'xe kó Cristu. <sup>14</sup>Ñá kaū'ví ka  
ení kō é kā'an ña iña Tó'o ko Jēsuú,  
kuān té nuu kutū u. Nté un siin ka  
ña káu'ví ña é kā'an ña tú'un Xuva  
kō.

<sup>15</sup>Iō ñá ntáka'an ntódo ña iñá  
Cristu tsí ntákune'u iní ña nī ko, tsí

ncho víi ña é díí ka nto'o ko. Ntá tsi iō túku ña'a ntáka'an ntódo ña iñá Cristu tsí ntio ña é kōo é vā'á nī ko. <sup>16</sup>Iō ñá'a ne, kuān o ntáde ña tsi dóo ntákuinima ñá ko. Ini ña tsi nuu kutū́ ú kuenta iña tú'un Xuva kō. <sup>17</sup>Iō túku ña'a ne, ntáka'an ntódo ña dadii iñá Cristu, ñá tē tsí ntio ña é vā'a, ntá tsi tē díí díí ka ta'xi ña é ntō'o ko dá nuu kutū́ u. <sup>18</sup>¿Nté koo ve? Ña té ini. Dōo diní ko vevii, tsi téku ña'a tú'un iñá Cristú, kuān té nuu é ntaā i e ntáka'an ñá, kuān té ña te kánii nima ñá ntáka'an ña.

Ña kóo da'na é nuu diní nimá ko, <sup>19</sup>tsí iní u tsí koo é vā'á iñá ko, tsí kaka'an ntā'ví nto ne, Espíritū Sántū e tá'xi Jesūcristú xntii ñā ko. <sup>20</sup>É ntio kó ne, nté uun nuu i é ña kuká'an nuú ko, ntá tsi kunuu ka'xi nimá ko vata koo é kuiko ñu'u ñā'a Cristu da íni ña tsi kuínti'xe kó ña é vī'a é ütén, kuān te kutuví ka u ñuxiví sa ne, kuān te kuví u. <sup>21</sup>Tsí te kutuví u ñuxiví sa ne, kutuví u nī Cristú, o kuān te kuví u ne, díí díí ka vā'a koo kutuví u ni ñā. <sup>22</sup>Te kutuví ka ú ñuxiví sa ne, iō tsíñu é víi u iña Tó'ō ko. Ntá tsi ñá iní u nee iña é nākaxnúu u. <sup>23</sup>Ntio kó ntuvi núu i san. Dōo ntio ko é kī'ín u kíkutuví u nī Cristu, tsi dóo vā'ā o. <sup>24</sup>Ntá tsi díí ka ntio nto é kutuví ka ú ñuxiví sa kuenta iña nto. <sup>25</sup>Dukuān é iní u tsí kutuví ka ú ni ntō vata koo é xntii ú nto, vata koo é díí ka kuínti'xe nto Xuva kō né, dōo diní kuntoo nto ni ñā. <sup>26</sup>Kidāá né, nanū'u ntó iní nto Jesucristu kuénta iñá ko, tsí nti'xi xtuku ú mí ntoo nto.

<sup>27</sup>Sá'ā e dóo ntio ko: é vii ntó vata kaa é káka'an tú'un va'á iñá Cristu.

Kuān te kixkóto ni'ní u nto, kuān té xoxó u, ntio kó kutuní ko tsí vata kaa uun tsi ña'a nto e ntákuínti'xe nto, vata kaa uun tsi ña'a nto ntáde tsiñu nto kuenta iña tú'un va'a é kuínti'xe nto. <sup>28</sup>Ñá ku u'vī ntó nee iña e ntáde ña'a da ntáde kini ña ni ntō. Dukuān é kūtuni ña tsí ña kuví víi ña ni ntō, tsí nakākú Xuva ko ntō. <sup>29</sup>Tsí kaduku ntée nto é ña te da mii tsí é kuínti'xe nto Cristu, tsí e ntó'o ntō dí kuenta iña ña. <sup>30</sup>Tsí dadii ntáde ú ni nto du'xen kuénta iña tú'un va'á san vatā o dé u kídaa ne, é ini nto tsí kuan tsí ó kade ú vevii.

**Nuu kutū́ Pablu da táxnūu  
ña tutú sa'a iña ña kuínti'xe  
i, ña ntoo ñuú Filipu**

**2** Tē nuu é ntaā i é naxnuu ka'nu Cristú nima ntó, tē nuu é ntaā i e dóo diní nto tsi ntákuinima ntó, tē nuu é ntaā i e ntaíka nto ni Espíritū Sántu, tē nuu é ntaā i e ntántunta'ví ini nto ne, <sup>2</sup>víi nto vata koo é nākunuu díní kue'én nimá ko. Uun tsi kadā kuení nto. Uun tsi kuínima ntó vata kaa uun tsi nima ntó, uun tsi dikí nto. <sup>3</sup>Ñá tē nee iñá víi nto iña mii nto, e dóo ka'nu ña'a ncho víi nto, ntá tsi víi nto vata kaa i'xá lu'nti, vata kaa te díí ka ka'nu ña nguii san é divi ntō. <sup>4</sup>Ñá te da mii iña nto koto nto, ntá tsi iña ta'an ntó di.

<sup>5</sup>Dadii tsi kadā kuení nto vatā o dé kuení Jesucristu. <sup>6</sup>Divi ña né, kuān té Xuva ko ñā, ntá tsi ña ni itsú'un ñā é xtuví mii ña é ntoo dadii ña ni Xuva kō, <sup>7</sup>tsi xtuví mii nti'xe ña iña ñá ne, kūvi ña ña kade tsiñu da káku ña vata kaa ña'a. <sup>8</sup>Dā

kúvi ña ña'a ne, díí díí ka ntulú'nti ñā, tsí dé ntaa ña un tsi da nté xi'i ñā, kuān te ntíkā krusi kán xi'i ña. <sup>9</sup>Dukuān ne, xé'e Xuva kō e dóo ka'nu ña. Xé'e ña ña uun dīvi é díí ka ka'nu é un ntíí ntíí dīvi ña'a. <sup>10</sup>Un ntíí ntíí ña'a, ña ntoo e dukún kán, ña ntoo ñuxiví san dī, nī ña ntoo má ñu'u kán ne, dá tekū ñā dīvi Jesuú ne, ná kunchiti ntāa ña. <sup>11</sup>Un ntíí ntíí ñā ka'an ña kídaā tsi Tó'o nti'xe ña Jesuú ne, ká'an ñā tsi dóo ka'nu Xuva kō.

**Ña kuínti'xe i ne, vata kaa ñu'u é ka'i'xi ñuxiví san**

<sup>12</sup>Dukuān ne, tá'ān kó e dóo kakuinimá ko, vata tsí o dé ntaa nto dí'na ne, kuan tsí koo víí nto vevii. Ñā te da mii tsí dá tūvi u ni ntō, tsí díí díí ka dá xoxó u. Tsí da xe é nakáku nto ne, kada tsiñu nto ni Xuva kō. Kuiko ñu'u nto ñā. <sup>13</sup>Tsí Xuva ko kade tsiñu ña ni ntō ne, dīvi ña xntii ña ntō é víi ntó nuu i é vā'a é ntio ña.

<sup>14</sup>Ñā ku tsi'i kuétsi nto ña'a. Ñā ku dutsi kuini ntó ni tā'an nto, <sup>15</sup>vata koo é ña koo kuétsi ntō, vata koo é ña kadá kuení nto nuu i é kīni kaa. Víí nto vata kaa i'xá Xuva kō, i'xá e dóo va'á kue'en, mé'ñū ña'a, ñā iō kuetsí i, ña ntáde é kīni kaa. Dīvi ntō ne, vata ntaa ñu'u ntāa nto é ntánaxi'í nuu nto, <sup>16</sup>tsi ntánañē'le nto ña'a tú'ūn e dóo va'a é nākáku ō. Dukuān ne, dá kī'xi xtuku Cristú ne, dōo diní ko tsí ña ká'an ña tsi é ntaā i é itúvi ú dé tsiñu ú ñuxiví sa. <sup>17</sup>Kuān té nakunáa ú ntuvi iñā ko kuenta iña ntó ne, te kuē'é nto nima ntó nta'a Xuva kō ne, ñā té nté kaa diní ko. Dōo diní ko dá

ntoo dīni nto. <sup>18</sup>É ntio kó ne, dadii kuntōo dīni ntó nī ko.

### **Timoteu ni Eprafódito**

<sup>19</sup>Tē Tó'o ko Jēsuu ntio ña ne, taxnūu ú Timoteu é kī'in ña mí ntoo nto vata koo é na kūtuní ko nté o de nto. Dukuan nākunúu diní nimá ko. <sup>20</sup>Xōxó tukú ña'a vata kaa Timoteú san e dóo kadē kuení ña te vā'a o ini nto. <sup>21</sup>Tuku ña'a ne, iña mii ña ntádē kuení ña, ñā te iña Jesúristu. <sup>22</sup>Ntá tsi ini nto tsi dóo va'á Timoteu. De tsiñu ña nī ko é kākā'an ntódo u tú'ūn va'á san vatā ó kade tsiñu i'xá ni uva i. <sup>23</sup>Ura tsí i tē kūtuní ko nté koo kuvi kó ne, taxnūu ú ña. <sup>24</sup>Á te tā'xi Tó'o ko tē ña na'á ka dá kī'in mii ú dī, kuini ko.

<sup>25</sup>Ntá tsi ñi dukuan nataxnūu ú Eprafodito, dīvi ēní kō é dadii dé tsiñu ú ni ñā, dadii dé u du'xen ni ñā, dīvi ñā é vē'xí ña kuenta iña nto é xntii ñā ko. <sup>26</sup>Un vā'a tsi kanaka'an ña ntō, un ntíí ntíí nto. Dōo kadē kuení ña tsi téku nto tsí etsin ña. <sup>27</sup>Ētsin nti'xe ña kídaā. Dókō sá ni xī'i ña. Ntá tsi ntúntā'ví ini Xuva ko ñā. Ntuntā'ví ini Xuva kō kó dī, tsí díí díí ka kúnta'xa ini ko tē dí ni xī'i ña. <sup>28</sup>Dōo diní ko é taxnūu ú ña ve, vata koo é nakunúu diní nima ntó tē ini xtuku nto ña. Ñā kutsu'ūn ká u xoo ñā'a xntii ña ntō. <sup>29</sup>Dodíní nto kī'i nto ña vata kaa doméni e tá'xi Xuva kō. Kuiko ñu'u nto ñā'a, ña vata ntāa ña sā'a. <sup>30</sup>Dókō sá ni xī'i ña dá kade tsiñu ña iña Cristu. Ñā ni dē kuení ña te kuvi ñā da xntii ña kó kuenta iña nto.

### **Nee é díí ka nuu á'vi**

**3** Ení ko, kūntoo dīnī ntó ni Xuva kō. Ñā kakudu'xēn kó te

dóo ki'in itō ka'án u ni nto sã'a, tsí kantio é ka'án u ni ntō. <sup>2</sup>Kuenta tsí vií nto ña kini ntáa, ña vata ntáa tñā diin, ña é ntaé'nte kúñū é íxi i vata koo é nākáku ña. <sup>3</sup>Tsí xo'ō ne, i'xá Xuva nti'xe ko kúvi ō, tsi ntánuu iní ko Xuva ko kaniñ nima ko. Dōo diní nuu nima ko kuenta iña Jesúcristu. Tsí ña kúvi nakákú mii ō kúñū kō. <sup>4</sup>Tē dí kuvi vii o nakákú mii ō kúñū kō ne, xu'u é díf díf ka kuvi vií u. <sup>5</sup>Tsí dā kuvi una ntúvi da káku ú ne, ē'nté ña kúñū é íxi ko vatā ó de ña Israee. Tatá ko ne, ña Israee. Uvā kó ne, i'xá Benjamiin. Da mii ku'len tsí ña hebreu u. Ntikín u lei vātā o ntáka'an ñā fariseu. <sup>6</sup>Ñā tē nté kaa ncho ka'ní u ña kuínti'xe i Cristu kídaā. Un vá'a tsi dé ntaa ú leí san di. <sup>7</sup>Ntá tsi nee iña é inuu á'vi iñá ko kídaā ne, ña nuu á'vi ka iñá ko, tsi é nī'í ko Cristu. <sup>8</sup>Ñā tē neé ka iña mií ko é nuu á'vi i, kuiní ko, tsí díf díf ka nuu á'vi é iní u Jesucristu, dívi Tó'ō ko. Kuenta iña ñā nakuíta ú un ntií ntií iñá ko. Vata kaa ñé'ē kaa, kuiní ko. Ñā káde ká u kuenta, tsi é nī'í ko Cristu. <sup>9</sup>É kúdadií ú nī Cristu, ntá tsi ñā te da xe é káde ntaa ú leí san, tsí da xe é kākuinti'xe kó Xuva kō né, dukuān é nī'í ko é vā'á nta'a ña. <sup>10</sup>Dōo ntio kó kiní vā'á u Cristu, é kūtuní ko nté kaa ntii iní ña é kúvi ntoto xtuku ña. Ntio ko é ntō'o kó vatā o ntó'o ña, kuān te na kuví u vatā o xi'i ñā, <sup>11</sup>vata koo é, te kúvi ne, ntoto xtuku ú di te ntóto ña xi'í san.

**Vii ō vata koo é xēe o  
mí'i e ntée na'a i**

<sup>12</sup>Váta ntūntaa va'á u; váta víi u é vā'a. Da ve un siin kade u é vā'a.

Ntá tsi ki'ín ka ú un tsi da nte koo é kúvi vií u é vā'a é ntio Jesucristu. <sup>13</sup>Ení ko, váta nī'í ko é kāká'án u. Ntá tsi uun tsi nuu i é káde u: ñā kadē kuení ka ko nēe e xtúvi u atá ko. Kaxíó ntii u vata koo é nī'í ko é tūví nuú ko. <sup>14</sup>Un tsi da nte koo é nī'í ko doméni e tá'xi Xuva kō, ña tuví e dukún kán, tsi kúdadií ú ni Jesucristu.

<sup>15</sup>Kuan koo kadā kuení ko, ūn ntií ntií o é ntūntaa o. Te tukū ó ntádē kuení nto ne, ta'xi Xuva kō é kūtuni nto. <sup>16</sup>Ntá tsi na káda ntaa o é ini o.

<sup>17</sup>Ení ko, ntada náa nto vatā ó kade u. Koto nto xoo ñá'a é kade ña vatā ó de u. <sup>18</sup>Tsi dóo iō ñá'a e ntáde ña vata kaa tē ña ntío kue'en ña Cristu é xi'i ña ntiká krusi kan kuénta iña ko. Ki'in ito kuān ó kaka'án u ni ntō ne, kaeku ú dá kāká'án u ni ntō. <sup>19</sup>Kūnaá ña te kuví ña. Dívi nima é ñā vā'a kúvi xuva ñā. Ña ntákuka'an nuu ña da ntáde ña é kīni kaa. Da mii tsí e ntádē kuení ña iña é iō ñuxiví san. <sup>20</sup>Ntá tsi xo'ō ne, e dúkūn kán ñuú kō. I'a tsi ntantétu ō tsi nté ikan vē'xí uun ña'a, ña é nakáku ko, divi ñā é nani ña Jesucristú, dívi Xuva kō. <sup>21</sup>Tē naínu ña ne, nakuído ña kúñū kō é kīni kaa sán ne, dá nadāma ña vata tsi kaa kúñū mii ñā, tsi dóo iō ntii ña é kúvi vií ña é un ntií'í.

**Kūntoo diní ntó nī Tó'o kō**

**4** Dukuān né, ení ko e dóo kakuinimá ko, e dóo ncho kiní u nto, divi ntō e dóo diní ko, divi ntō e kúvi nto doméni é nī'í ko, ñā ku tee dā'na nto é kuínti'xe nto Xuva kō.

<sup>2</sup>Kaikán u Evodia ni Síntique é vii ñá da xe'e na ntūvá'a ña ni tā'an ña. Ña nāá ka ña, tsí uun tsi kadā kuení ña iña Xuva ko. <sup>3</sup>Divi ntō dí, é dādii dé tsiñu ú ni ntō ne, víí nto da xe'e, xntii nto ntuvi ñá dī'í san. Dadii tsi dé tsiñu ú ni ña kuēnta iña tú'ūn va'á san, ni Clémenté di, ni ūn ntíí ntíí ña dé tsiñu nī kó, ña é uve na'a divi í mí'i xntée na'a Xúva ko divi un ntíí ntíí ña'a, ña kuínti'xe i.

<sup>4</sup>Nii kuē'en tsi ntuvi kūntoo díní nto, tsí uun tsi Xuva kō. Kaka'an xtúku ú ni ntō tsí kūntōo díní nto. <sup>5</sup>Víí nto vata koo é na kūtuni ñá'á tsí ío nima va'á nto. Dókō sa naínú Tó'lo kō.

<sup>6</sup>Ñá tē nee iñá kutsu'un ntō. Kákan nto nta'a Xuva ko da nēé ka é kātaan núu nto. Ka'an ntá'vī ntó ne, nakué'le nto ña sintiá'vi di. <sup>7</sup>Dukuān ne, tá'xi Xuva kō é kūntoo vá'a nto. Ntē ñá ini ō é kuān nte vá'a koo kúntoo ō, tsí mii tsi Xuva kō é kūvi víí ña ta'xi ña é kūntoo vá'a nima ntó ne, ña kúvī é ntē dúkuan kadā kuení nto, tsí e ntúdadii nto ni Jesūcristu.

#### **Kadā kuení nto nee iña é vā'a**

<sup>8</sup>Ení ko, sá'a kadā kuení nto ve: nee iña é nuu é ntaā í, nee iña é kuvi kuiko ñu'u ō, nee iña é vā'á, nee iña é ña tuvi é kīni kaa, nee iñá é kuinima ko, nee iña é kaka'an ñá'a e dóo va'á, da nēé ka é ío e dóo va'a. Da nēé ka é kūvi ka'an o tsi dóo va'á ne, divi kadā kuení nto.

<sup>9</sup>É un ntí'í é nakuā'a ú nto, é kākā'an u é vii nto, é tēkú nto é kākā'an u, é ini nto é dé u ne, kuān koo víí nto. Kidāá né, Xuva ko kūnuu mé'ñu ña nto. Divi ña tā'xi ña é kūntoo vá'a ō.

#### **Dómēni é xe'é ña ñuú**

##### **Filipu iñá Pablu**

<sup>10</sup>Dōo diní ko tsí tá'xi Xuva kō é naka'an xtúku nto kó vevii. Ñá kakā'an u é kunáa ini ntó ko, ntá tsi ña ni ní'i nto nté koo xntii ntō ko. <sup>11</sup>Ñá te kātsi'i kuétsi ú te ío é kātaan nuú ko. É kūtú've ko é kutūvi díní u da nēé ka é ío iñá ko. <sup>12</sup>Iní u nté koo kutūví u dá ña tuvi nee iña é ío iñá ko. Iní u nté koo kutūví u dá ío iñá ko. É kūtú've kó é kutūvi díní u da mí'i ká tuví u, nté koo kutūví u da dóo ío é ká'xí u, nté koo kutūví u dá kakākin ko, nté koo kutūví u da dóo ío iñá ko, nté koo kutūví u dá ña tuvi nee iña é ío iñá ko. <sup>13</sup>É kūvi víí u é un ntí'í, tsí Cristu kaxntíí ña ko. <sup>14</sup>Ntá tsi ntadiá'vi ntō, tsi dóo vá'á o dé nto e xntíí ntō ko dá kant'lo ko.

<sup>15</sup>Divi ntō ña ñuú Filipú ne, ini nto tsi dá kakā'an ntódo di'na u tú'ūn va'á san, da ntáka ú ñuú Macedoniá ne, ña túvi tūku xúkūn mí'i xntii ñá kó vata ō xntíí ntō ko. <sup>16</sup>Kuān te dá itúvi ú ñuú Tesalonicá ne, ñá te ūun ito tsi táxnūu nto é ntio ko. <sup>17</sup>Ñá te kantukū ú domēni, ntá tsi dóo diní ko tsí kutuni Xúva kō tsí kade nto e dóo va'a. <sup>18</sup>É ío ntí'í é kántio kó ve ne, katantée. Ñá tē nee ka kataan núu kó, tsi e kíxni'i Eprafōdito domēni e táxnūu nto iñá ko. Dómēni san ne, vata kaa kútū e dóo vá'a ñē'e iña Xuva kó ne, dōo diní ña é kuān o dé nto nī ko. <sup>19</sup>Xuva kō ne, ta'xi ña é un ntí'í é ntátaan núu nto, tsi dóo ío iña ña e dukún kán. Tsi é un ntí'í ío iña Jesúcristu. <sup>20</sup>Nanu'ū ó ini ko Xuva ko ntii dañu ntūvi, tsí divi ña é dóo va'á ña. Kuan tsi koo na kōo.

**Tū'un e ntí'ī tutú san**

<sup>21</sup>Ká'an ntō ntiusi ní un ntí'í ntí'í ña'a, ña e ntúntoo nima i é ntoo ña nī Cristu. Ení nto, ña ntoo i'a ne, taxnūu ñá ntiusi ntó di. <sup>22</sup>Un ntí'í ntí'í ña'a, ña ntoo i'a, ña

ntáduku ntée Xuva kō né, taxnūu ñá ntiusi nto. Dí'í dí'í ka kaka'an ñá ntoo nú vi'i ña tsiñu i, ñá nani Cesa.

<sup>23</sup>Na nāxnuu viko Tó'o ko Jesūcristu ntó, un ntí'í ntí'í nto. Kuan tsí koo é kā'án u ni ntō.